太上洞玄靈寶宣戒首悔眾罪保護經

經名:太上洞玄靈寶宣戒首悔眾罪保護經。撰人不詳,約出於南北期末。 從內容看,當係《昇玄內教經》之缺卷。原本三卷,缺上卷。底本出處:《正 統道藏》 洞真部戒律類。

上卷原缺

太上洞玄靈寶宣戒首悔眾罪保護經卷中

太上道君曰: 世俗之人從宿世以來所犯過惡, 逮至己身, 童蒙愚癡, 不解 道義,不知教法,不曉施行,不識逆順,犯於天禁地忌、四時五行、陰陽柔剛 、日月星辰、道德神明,上則不孝於天地、君王、父母、耆老尊長,下則所惡 於臣子卑賤、蝖飛蠕動,積罪累過,結成千萬殃考對逮,無窮盡時,亡筭奪紀 ,不可勝數。所犯過惡者,當以瞋恚怒罰、毒想怨恨為過,以反虜殘病、陰賊 酷暴為過,以伐殺刺傷、毀敗刑戮為過,以侵詐晻弱、輕侮服易為過,以侫媚 憎愛、蠱諂詭人為過,以陰私妬忌、淫泆驕慢為過,以嗜酒酣飲、嘔吐沈溺為 過,以權勢侵凌、嗊嗃豪傑為過,以貪利諛諂、盜竊拾遺為過,以嗜得惡施、 慳惜無濟、劫死脫亡為過,以威脅智策、刺譏擊切為過,以掘陵發塚、殘屍露 骨為過,以誑詐調譴、誣誷攻伐為過,以妄言訟鬬、敗亂迷誤為過,以謗訕聖 賢、評論毀譽為過,以縱極情慾、多態淫泆為過,以身縱恣細濡、口貪滋味為 過,以言不擇語、行不擇道為過,以心不善想、目不擇視為過,以耳不擇聲、 鼻不擇香為過。過惡如是者,為君則無以為仁,為臣則無以為忠,為吏則無以 為平,為父則無以為慈,為子則無以為孝,為母則無以為愛,為兄則無以為悌 , 為弟則無以為順, 為友則無以為廉, 為婦則無以為恭, 為男則無以為良, 為 女則無以為貞,為師則無以為教,為徒則無以為敬,為上則無以為訓,為下則 無以為禮,為鄉黨則無以為讓,為朋友則無以為信,為宗族則無以為和,為丈 夫則無以為實,為奴婢則無以為勤,為修身則無以為益,為學道則無以為仙。 是故治國者不能致太平、治家者不能致其吉、治身者不能王其壽、治業者不能 全其功。是故道在廣念,德愛蒼生,恩及無外,潤及無內;應殞之人賜之更生 , 罪結之人聽以首悔。首悔之者, 皆當言議送款, 竭情寫意, 六齋十直, 庚申 甲子,八節本命,入室燒香,披陳愆犯,則罪無不原,過無不除,功無不積 , 德無不立, 道無不感, 仙無不成。若不能依按齋直之日, 但當請經供養。建 齋之時及朔望本命之日,至心丹苦,首悔所犯,則其功彌重,罪無不赦。今以 教子, 勤心宗奉, 則福田興矣, 業行立矣。天師唯唯, 伏受命旨。

太上道君曰:凡為百姓男子女人,帝王國主建齋行道,法師於高座上為轉誦此首悔之文。若不能諦誦者,當依靈寶齋法,壇內靖中隨便安置,一時一日,乃至三日,逐物豐儉,貧富量之,金龍綵色,以鎮十方。若用科儀,當稱齋

主姓名、年紀、戶口多少,令齋主再拜,稽百仰三,自搏伏地叩頭。法師當於高座為其誦悔過之文,首寫主人存亡罪失,則功感諸天,罪滅九陰,福德歸流,恩祐斯降,真氣來下,存亡兩散,人鬼俱解。其功無量,仙道成就,魔王敬禮,門戶清肅,鬼妖不忏,功德之大,莫復是勝。今以授子,善寶之焉。天師稽首,敬受教誡。真人曰:誦首悔之文,當作經音誦之。

第一再拜,稽首叩頭,仰三自搏。法師頌言:

上啟太上無極大道、三寶尊神: 州縣鄉里男女官, 某乙行年、戶口、若干 人,今因齋次,披解上世宿罪重過,乞願至真,願降法澤,賜以大慈,原宥眾 生及今齋主先世九玄七祖,下及五服六親。或為人君、長吏,治行多違,政教 不平,少公多私,苟貪財色,發賦不均,教人刺譏,訪作盲文,伺察非辜,吹 毛求瑕, 多冒販踞, 店肆賣買, 遏遮四路, 割賤奪貴, 農桑盛要, 役奪時務 , 囚吉放凶, 輕原禍惡, 重刑福業, 阿諛所親, 翦戮良賢, 逐寵盛傑, 殘虐弱 賤,放縱狼吏豺佐、虎將熊士,晝息夜飲,六畜暴死,蠶食百姓,侵剋所統 ,贓負積兆,罪過累億。為君不賢,為臣不忠,為吏不廉,在公不清貞,在私 不直方,忤亂正法,曲從其心,狂筆巧文,迷誤視聽。受人賄貨,縱死殺生。 或誘罪納貨,正筆不貸;或恐懼無罪,強取寶物;或篡弒叛逆,誅男略女,收 婢攝奴, 撾歐直正, 鞭撻無罪, 傷害無愆, 伏誅無辜; 或劫抄虜掠, 凌奪人物 , 七寶五綵、六畜孳牲; 或無辜動眾, 興軍戰伐, 驅令生民, 投之死地, 孤魂 絕域, 汗血涌流, 屍鬼哀哀, 叢林之側, 窮魂最最, 九泉之下, 生者稱苦, 怨 聲聞天, 死者抱恨, 訟訴九陰, 冤對之交, 考過相連; 或攻伐國家, 殘酷無端 ; 或弋獵眾生,殞殺含氣,飛鷹走犬,食啖其肉,殞胎剝卵,羅藏網匿,盪射 繳刺,惡心凶意,不仁不義;或酴酒漏腐,毒餌內藥,勸人食之,五心內爛 , 危沒人命; 或因恃貴高, 自怙富室, 自方雲日, 欺薄倫類, 寄意霄外, 愚謂 貴富,長久歷世,毀詬至真,疑笑道士,調弄真人,自伐本根。京罪兆過,不 可復勝。諸如此等,死受罪對,殃流後世,致使凡夫仕宦不遷,為居衰貧,口 數耗臧,疾病流連;或胤息不保,男女夭年,產業隙微,不係祖先,先緣不豐 ,不免饑寒。凡百無可言宣失次,皆由所犯過惡如是。今為存亡悔之。伏願天 尊唯垂原除。

第二又再拜,稽首叩頭,仰三自搏。法師頌言:

上啟太上無極大道、三寶尊神,原恕施主先世以來,下及見身,自識事以來,實多惡少善,多逆少順,違天負地,觸迕星辰,為臣不能忠於君上,為子不能孝於父母,為婦不能恭於舅姑,為弟妹不能順於兄姊。既以為人,不能有慈愛之心、仁篤之行,狼戾偏黨,瞋喜無常。六齋吉日,忤犯玄司。當其所愛,欲令其生;值其所憎,故令其死。撾悍無為,罵詈衝口,苟欲自可,貪味饕

美。大小錯互,家無法度。背德向色,遊好傲蕩。凌孤欺寡,取非其有。心意奢逸,言行驕慢。凡所施為,動有罪俱。不畏鬼神,不忌科戒,不慮禍惡,不量進退,不避禁忌,不從仁義,慳貪嗜得,無以為施。責望人報,喜作竊盜。人中欺劫,公行曲枉。圖人利益,常戲笑人。取人長錢,與人短數,輕秤小斗,狹幅短度;強持與人,重秤大斗,專以取人。假託形勢,言則因官;自恃凶點,諂誑迷愚;心實不清,千真喚神。掘陵發塚,攻劫死魂。詐紿借貸,取非其財,衣非其衣,食非其食,飲非其飲,盜人六畜,五果雜菜,五穀桑竹,枝茂樹木。貪鄙之性,罪彰神明;動靜所為,違科犯律。莫大之罪,剋書右司。致令凡家營生不利,屢有變怪,貧賤困苦,孤微凍陋,數有亡遺,大小不和,更相怨恚,強健者少,病苦者多,皆由所犯過惡如是。今故為存亡悔之,伏願天尊唯垂原除。

第三又再拜,稽首叩頭,仰三自搏。法師頌言:

上啟太上無極大道、三寶尊神,願降大慈,削除臣等先世殃考,逮及今身罪嬰,自有識以來,實夫妻不能相承善事,反變惡態,既無清潔之志,心嫉意妬,隱切爭訟,更相憎忌。呵男罵女,打厲奴婢,咄賓叱客,絕交鄰里,鄉黨不信,骨肉不睦,六親不和,九族不篤,繫怒六畜,瞋疑妻妾。悅和奸朋,譆同切友,安偷容劫,知情羣凶。專作呪詛,陰為殘害;容媚蠱禱,外善內惡;嫉賢妬能,壅塞高才,毀訾英賢,折辱良善,汙染清潔,瑕穢端白。咀人之豪,憎人之富。心常狙獺,意懷兇惡,舌如錐刀,口含毒螫,不仁不義,無禮無忠。自以為是,謂他為非,自矜自誇,自是自大。積年積歲,不能自知。詐欺慢誕,誣調返說,無誠無信,指南作北,戾東為西,調戲父母,殆折師君,不避親疏,不忌所尊,岐嚥兩舌,鬭亂奸惡,阿言諛語,常有爭欺。治生販賣,專為誑巧,校計銖兩,持長作短,以醜易好,求欲無厭。公行不軌,私侵忠良,輕易四大,汙穢三光,放癡卑賤,馳逐豪彊。其心戚戚,其意促促。千愆積於四司,萬過書於五帝,積歲累月,不可稱數。致使凡家常致撼軻,所為不諧,學法不聰,仙道不成,流俗所笑,口舌妄生,禍變累仍,眾庶所憎,長吏所欺。凡百無吉,皆由所犯過惡如是。今為存亡悔之,伏願天尊唯垂源除。

第四又再拜,稽首叩頭,仰三自搏。法師頌曰:

上啟太上無極大道、三寶尊神,願捨慈恩,願赦齋主先世,爰及今身,自有知以來,實無功受祿,無德受賞。不能作善,笑人作善;不能受化,謗訕聖教。竊盜經書,輕穢聖賢,背毀反逆,叛道入邪,敗壞成功,快縱逐非。見人謬失,心口刺譏。見賢人而懷瞋,覿高才而生嫉。愛濫夫,憎美士,好他之惡,恥彼之善。不信作惡得惡,作罪得罪,不知可改故作不休,知不可犯故犯不止。借不念歸,貸不念償,輕虧窮乏,說譴愚癡。教人作惡,勸人為非。居貧

窶寶,不能自責,但行怨望,強欲他物。得便歡喜,失便忿怒。泄其惡心,伺 便繫人。陰司汙穢, 身不清潔, 裸形夜起, 忤逆星辰, 呵風罵雨, 不敬神靈 , 耗亂陰陽, 憭唳五行。滅人自益, 危人自安; 說人之功, 為己之名。所為無 可,所作不當。輕老易小,驕慢縱橫。外不良謹,內不慈仁。別人九族;離人 六親; 南人之父, 北人之子, 東人之夫, 西人之婦; 乖人之男, 隔人之女。教 人墮胎,導人落子,唯存殺害,不重人命。心有所恨,燒香啟神,妄禱百鬼 , 呼天喚地。三光神祇, 呪令其死, 詛令其亡, 凶心不善, 恒生毒念。想人婦 女, 憶人精華。願念所存, 思合奸猾。不建於功德, 又無施與之心。或學闕明 師,習無正軌,口銜草木,心懷沙石。或自恃其年高,竟弗就於大訓,身無一 戒,妄稱三洞。或為女人形服,臭穢不能清潔,濫霑尊位道場,心攀色境。或 見人貧悴孤弱,倍生憍侮欺誕。或飲酒昏醉,猖狂迷悶,非法妄言,干知天時 ,幻惑無度。或入宮觀,不拜經像。或與俗人交涉野合,密行情慾,為四司所 奏, 無善之功; 五帝所糾, 有辜之釁。致使生緣窮悸, 觸事不昌, 恒嬰否頓 ,數遇危難,多愁不樂,懷憂而行,積年無歡,歷歲無泰,心闇意塞,智慮幅 懷, 儜積冥昧, 六情不啟, 義理不通, 所願不果, 所求不得, 營事不成, 仕宦 不進,生業不登,宅舍不安,大小禍患,學問不達,修道不仙,皆由所犯過惡 如是。今為凡夫存亡悔之。伏願天尊唯垂原除。

第五又再拜,稽首叩頭,仰三自搏,法師頌言:

上啟太上無極大道、元始天尊、三寶尊經,伏願至真瀉澤潛灑,原赦凡家 九玄七世千曾億祖、先亡後化、上世以來一切靈神,各由先身立行不仁,壽早 永終,後生未長,不能具悉作何死亡。或頭痛額熱,五內恍惚,身體凍冷,卧 床而死。或病苦積年, 尪贏杖骨, 歷歲而死。或毒治警嗽吐血, 脹滿癥結, 蠱 毒鴆藥,內爛而死。或四肢浮腫,瘨癡癱疽,流血瘡膿,生蟲結瘡,瘧癖變跛 , 腕節解落, 筋脉朽絕而死。或聾盲瘖瘂, 七竅壅塞, 便曲閉脹, 穀水不通而 死。或風癲頭癇,鬼魅狂荒,反眼吐舌,角弓梱張,牛呼羊昤,犬呻雞鳴,投 坑越谷,不避水火而死。或臨兵蹈刀,刀劍所斫,矛戟所刺,弓弩所射,割屍 斷頭,形骸剝截而死。或為蛇蝗蜂螫、鷹狸豺狼,龍虎牛馬、犬猪齧嚼觗踏而 死。或登峻緣木,尋橋沈舟,乘馬駕車,從高墮下,沈溺摧折而死。或遭偷行 偷,遭劫行劫,道路伏賊,鬥變打捍,被敵路側而死。或被官私威勢猛臨而死 。或死非其鄉,亡非其域,血流途道,膏腴草水,流寄他方,客旅而死。或遭 荒遇亂,絕糧饑餓,逢寒值熱,乏渴而死。或偏枯不仁,癩病惡疾,面目瘡痍 , 鼻崩耳缺, 棄逮窮鄉, 捐放邊裔而死。或為惡人所棒, 麤夫所歐, 皮膚胸心 刀刺、屍傷、破骨肢節碎跌,目瞎齒折,五臟瘀熱而死。或被邪歹羊相逮,先 殃、沙氣相鍾, 厭鬼所殺, 奄忽而死。或吐血噎哽, 痳痢赤白, 內堅外結, 尪

萎而死。或精液内漏,經脉不流,五勞七傷,顏黃白黧,手足痿疼,枯焦而死 。或遭罪致獄,臨刑都市,伏法囚刑而死。或傷胎落子,腥血而死。或生男不 育,生女不長,夭折昏盲,不睹日月而死。或值雷電霹靂,而題脊書背,誅擊 而亡。或水沒火燒,木打石擲,土壓淰漂而死。或夜軍行,提刀負弩,氣棘力 倦, 勞苦而死。諸如此等, 雖為一死, 而痛各異, 皆由宿命因緣所致, 隨運而 死。既壽易衰,不以道理。先身無福,不仁之罪,身謝三官,一旦沈墜,幽途 魂魄, 各受宿對, 囚謫地獄、酆都、三官六府之中, 懸頭鎖械, 足立三刀, 緣 刀山,循劍樹,食火啗炭,鑊湯所煮,炎火所燒,吞冰飲毒,拔舌灌口,朝笞 暮押,身體毀爛,形骸焦燎,魂爽酸楚,痛毒激切,已經三掠,難得解脫,哀 哀長夜之中,勞勞餓鬼之羣,愁苦三途之中,抱酷五苦之庭。綿歷數劫,罪對 不赦。希活則生途四塞,願生則無緣可攀。乞死不得,長淪罪原,永乖同泰 ,餘殃不盡,引逮後生,惡惡相續,咎咎相纏。致令愚俗述否相仍,仕宦不能 致禄, 營生不能飽暖, 男女大小, 憂苦無泰。今為眾生上世今世先亡後死, 首 悔斯苦,不仁之罪、不善之愆,元逆之過,違和負順,迕天逆地,觸忤靈神 ,輕犯科法,所行不軌,罪高山嶽,過積海淵,致使先亡後死不以道理,千病 萬痛,十苦百疾,毒傷而亡,皆先身不仁之對。特乞大慈賜以矜原,隨亡者死 時所由絕命之所,解脫窮魂,拔度苦魄,得遠北酆、三官逮役,去免九幽,昇 上天堂。浄鬼之林,無為之鄉,斷絕復連,利祐子孫,宅舍安吉,胤嗣完全 ; 凶神惡魔不得妄性, 天覆地載, 神明護助, 學道得道, 求仙得仙, 富貴長保 , 安樂自然。於是主人再拜叩頭, 稱受道恩。

太上洞玄靈寶宣戒首悔眾罪保護經卷中竟太上洞玄靈寶宣戒首悔眾罪保護經卷下

太上道君告天師道陵曰:此首悔之法、《昇玄品經》為道德之籬落,是至真之垣墙,生死之津乘,兆庶之橋梁,立身之福田,功業之淵場,養性之生途,修至真之仙方,解罪犯之大法,修行之首宗,極生之上善,拔死之第一,消灾之真科,散禍之祕術,安國之弘教,寧家之肅約,為學之智慧,希善之富博,治病之良方,救疾之善藥,神明之樞機,萬病之扁鵲。無上至真,大道洪範,弘敷世教,濟度無涯。頌之解過,則千罪冰消,萬過雪散;誦之救死,則苦魂冤魄永去荼炭。解脫五苦,超拔八難,神登道舍淨鬼之林。上遊玄都之墟,下晏崑闕之場。存亡俱濟,福利日昌。誦之求一及,則殃流絕逮,宿咎消滅,生者獲福,常處安吉。死籍削除於右宮,生錄注簡於左契。於是修經行道,長齋苦行,安神定志,丹誠念道,歸心無上正真之庭,宗《昇玄內教真經》無上統天畢契之錄,佩身為寶,則坐待雲駕,超騰太空,上謁虛皇,逍遙玉京。子當寶祕,依法施行,建功滅過,如響應聲。修善禍自殄,建功福自生,譬

如鑒鏡,曲直隨形。奉法當盡心,敬師當竭誠;心盡神明知,謁誠至理精。如此不懈怠,昇仙克長生。叮嚀告萬兆,汝當宣是經。是經眾法祖,無上之至靈。供養必得道,控雲登玉清。妙哉至真文,宗者善敬聽。

太上道君告天師曰:若有賢男子,及有善婦女,欲修身奉法,專心持戒,營生求仙,好道樂經,改心易行,返悔過惡,丹苦一意,至誠無疑,欲求長生老壽,神仙度世,脫灾免苦,去離患難,輪轉善場,常與福俱,生則安樂,死則蟬蛻,學道得道,白日昇天,存亡終始,齊光日月,解脫憂苦,常懷歡悅。所作過惡,皆當悔之。悔過之法,當盡輪誠,一切歸實,不當隱蔽,益子之罪。天師唯唯,敬受戒言。

太上道君告天師曰:善男子,善女人,若欲長為種民,保壽延年,千載之後,身能變化,長處神州,不遷荒域,常在有道之國,恒生孝慈之門,不墮無德之處,不生邊國之鄉,去離痛痒,與福相傳,與善相隨,不與禽獸同類,不與惡鬼為隸,容姿麗好,身無癡瘦,聰明洞徹,慧為智宗者,存亡所犯千罪萬過,皆當悔之。一切歸實,不當隱蔽,益子之罪。天師唯唯,敬受戒言。

太上道君告天師:善男子,善女人,若欲治病療疾,消灾拔命,救死護生,處世無憂,所為即成,所願即至,宅舍清隱,田蠶倍收,興生有利,為眾所愛,長吏所敬,子孫昌熾,富貴榮顯,無不獲吉,無不安寧,所願從心,所念順志,修經求道,願見真君者,所犯過惡,皆當悔之。悔過之法,唯在款實,遣情送心,必令上聞,虛皇道眼,自鑒爾心。有隱益罪,道不虛言。天師唯唯,敬受戒言。

太上道君告天師曰:善男子,善女人,若欲知宿世之所在,存亡之苦樂,欲得知為善得善,種福得福,樹恩施惠,立功補過,憶識宿命之所行,非及我身,覺悟罪福善惡之對,知有今身從先身來,轉生入死,輪死入生,因其所因,因不絕因;緣其所緣,緣不絕緣,得有今日立我之身。憶知此已,思建善業,唯恐我身更受後身,不得如今而我此身,又恐此身後生之所不得明識,或失人道,不如今身。唯恃今身廣作福田。能如是者,得願如此。若欲不復貧窮下賤,欲不復孤寡衰微,欲不復寒凍饑餓,欲不復乞丐賣煦,欲不復灾害病患,欲不復耳聾目暝,欲不復癡愚邪見,欲不復枉遭縣官,欲不復為奴婢倅侍,欲不復讒諛所橫,欲長與聖賢相遇,欲與明師寶經相連,欲與真人、仙人相逢,欲與善人、福人、德人教訓相值,欲令仙道成就者,所犯過惡,皆當悔之。悔過之法,皆當丹盡,委曲首謝,不得藏重首輕,益子之罪。科威嚴峻,道不虚言。天師唯唯,敬受戒言。

太上道君告天師曰:善男子、善女人,欲令先世無餘基債、曩愆昔考、宿罪久過;欲令今世無相負累、初罪新嬰、考違謫負、目前深咎,欲令三曾五祖

、九玄七世皆使解脫三途,悉令遠離五苦,欲令後生子孫揚穗,大小昌熾,四體完具,年命壽老,處水不寒,入火不熱,不痛不痒,不饑不渴,欲令百怪不能駭,百禍不能害,龍潛鳳舉,出入不可制者,所犯過惡,皆當悔之。悔過之法,唯在丹款,首謝曲盡,則惡無不除,過無不原。疏慢不恭,益子之罪。道不虚言,子慎之焉!天師唯唯,敬受戒言。

太上道君曰: 若有君臣、父子、兄弟、夫婦、大家奴婢,各欲悔過者,皆 當為師設禮,叩頭自搏,整身自檢,清肅恭敬,專心正念,奉承教命。法師當 於高座上為講誦首悔之文。若於靜室壇堂,亦可隨時轉經行道。夫道無為,窈 窈冥冥,視之不見,聽之無聲。凡人心至,感知人情,見不假目,聽不假耳。 故謂神明把握至法,制御羣情,布教施戒,以遺愚民。師為首悔,其罪即原 ;遂事不改,其罪益深。人貴能及,道貴能微。朝過夕改,聖人所稱。故人作 善者,為治地也;守法戒者,為耕犁也;布施惠者,為植種也;悔罪過者,為 鋤鏺也;修清淨者,為生榮苗也;受經文者,猶得雨澤也;建齋直者,如稼穡 滋秀也; 道德成者, 猶如收斂也。能宣傳法教, 廣度天人, 拯拔存亡, 救恤窮 厄,治護疾病者,猶如開倉施貧,飯饑飲渴,令眾得飽而身自足,無乏少也。 轉經首悔,然後獲福,亦復如是。所謂福田也,所謂善業也。是以此經此法 , 功德無上。國主悔過, 天灾為除; 賢臣悔過, 地害為消; 慈父悔過, 家無妖 怪; 孝子悔過, 凶禍為止; 仁兄悔過, 家離殃咎; 順弟悔過, 門無怨怒; 廉夫 悔過,口舌不起;貞婦悔過,保宜子孫;是男悔過,和睦家里;是女悔過,婚 姻通理; 丈夫悔過, 不乏所使; 奴婢悔過, 得兔驅恥, 道士悔過, 三官不羈 ; 養性悔過, 絕穀不危; 修仙悔過, 白日登霞; 為居悔過, 福覆一家; 為國悔 過,九州平和。悔過之功,其道高重。罪福立彰,子知不乎?

天師再拜,上白天尊:教戒委備,輒請奉宣。臣道陵願令天下之人皆得心開意解,知為悔過,得免其罪,故致家國太平安樂,長生久壽。臣願天尊當以道力餘哺施與未及者,令知作善得善,作福得福,如種五穀,收穫計其利潤百千萬倍。諸有未悔者,願令奉化;諸未昇度者,願令濟拔;諸未得道者,願令登仙;諸未應生者,願令長延。臣之微願,因由天尊,若不垂慈,眾生沉墜,為罪造殃,恐更日甚。今發劣言,願重開示。

太上道君答天師曰:子之所言,善哉要乎!夫過惡者是凡之務,謂世俗之人去聖久遠,大化淪薄,濁氣浮厚,智慧淺末,不識禍福,謬誤迷惑,不自覺知,冒罪觸法,不知所由。故吐經戒,以示不悟,教之反悔,令除過咎也。盲者朗然開明,剛強者令反柔弱;反凶為吉,轉禍為福;導之以生津,化之以真道。而人知不可作故作,知不可為故為,今日悔,明日犯,其性不改,其惡不止,禍至乃閉門,罪定方憂恐,鎖訖方求解,縛畢方希脫,病重方自治,臨死

方望活, 炁盡方求益, 命絕方求續。至爾之時, 天不及護, 神不能生, 鬼不能 活,雖遇聖賢神德之人,灾不為散,病不為療,王父不能挺其命,王母不能延 其壽。凡欲建福,必在禍先,積功累德,必未萌之前。譬若春種,秋望其實 ; 臨饑耕田,不解於饑; 臨渴穿井,不救卒乏。消禍莫若營福, 積功莫若修身 。營福修身,幸宜殷勤,道德之門自開,凶惡之戶自塞,福起十方,殃減九陰 。若無善功植在禍先者,則臨命將危,傾財竭產,叩頭師門,稽首德宇,豈得 免乎?皇天雖高,其聽甚卑。凡人身中常有伺過之神,隨時上下,白人善惡。 過滿百二十為一刻,刻者令人多衰少利。百八十過為一耗,耗者令人六畜傷損 。三百六十過為一漏,漏者令人喜發疾病。五百四十過為一凶,凶者令人瘖瘂 聾盲。一千八十過為一禍,禍者令人暴殘死亡。千二百過為一殘,殘者出凶逆 亂之人。千三百過為一咎,咎者令人絕嗣無子。千四百四十過為一皋,皋者殃 流於五世,癭痾大禍所縛。千六百二十過為一謫,謫者令人斷胤無嗣。千八百 過為一患,患者主為奴婢,家內耗亂。千九百八十過為一橫,橫者家出癲癇狂 癡之子。二千一百六十過為一暴,暴者家出反逆,父子、兄弟、自相攻伐;出 邪巫鬼異,妄說神教。二千六百九十過為一灾,灾者家出骨肉內淫亂勃,生育 非真。三千六百過為一異,異者家出青盲癃殘。三千二百四十過為一變,變者 家出詔獄死族被誅。三千四百二十過為一怪,怪者家出乞丐,都市刑人,死不 以埋,骸骨損棄,無人收拾。三千六百過為一刻滿,刻滿則定死,魂神漂浪。 隨考輕重,付與三途五苦,淪溺備艱,辛苦痛毒,不可堪忍,訟對生人。雖言 空虛曠蕩,斯則法律孱然。今以告於子,子當寶祕宣傳。

太上道君又重言曰:人生或年二十、三十而三刻滿,則致凶殘;或五十、六十而三刻滿,則致凶殘。年小來有過而殘命者,受其先世餘過也,或接行惡逆,竟年壽而不遇患者,受其先世餘慶也。故積德之後,有其餘福,積惡之後,有其餘禍。故人能悔過者,上天鑒之,為人卻刻,一悔過即為卻三刻,三悔過即為卻九刻。而復後犯不止,罪應定死。故人欲消灾散暴,治病療疾,當漸以歲月,思愆自責,改悔過罪。誠能行之,出自至心,感激恐怖,墮泣流汗,天知至誠,地神申信。行之一日,其人身中伺過之神為人上除一刻;行之百日,上除二刻;行之一歲,上除三刻;行之三年,其福自應。不思返悔,其過日增,其禍益深,小過止其身,大過流子孫。善男子、善女人,能請經師到宅,建立齋直,燒香行道,或一日一夕,或三日三夕,勤心苦誠,日夕六時,讀誦此昇玄悔過之文,功感諸天真神降房,玄司除刻,罪過蒙原。積善如梁上塵,積惡如突中煙。可不慎哉,可不慎哉!天師稽首,再拜奉行。

天師曰:無上登天昇玄畢契,未受方素契積年者,不得便佩此契。慎之。 內教無上登天畢券契儀 太上靈寶昇玄內教宣戒首悔眾罪保護生緣品、無上登天畢券傳合真之人,都統三洞三萬六千六百六十畢事契,令弟子何泰句凝寂等,依科齎信,上金九兩,白銀十二兩,五綵紋繒五匹,信錢二萬四千,詣昇玄法師邊奉受身佩,修行積年,並有靈應,真神三元,安鎮丹田,神男、玉女侍衛左右,法傳應為昇玄內仙之人。某州某縣道士某,今太歲某年某月某日,傳道士某觀。前已受方素七十二字契盟,並已經年,誠積功著,翹勤無懈。諸天所悉,大聖所鑒。三官死名,久以削滅,應備上仙昇玄品中,依法奉受,以為身寶,惠舟自引。三天為證,九地為盟,九盟為保,神明為任,誓不違科犯戒,冒法觸律。一旦愆失,身謝三官,死為下鬼,長失人道,永充囚役。明謹無過,定仙天府,生死得道,不羈地官。一如《靈寶昇玄內教無上登天契》之律令。

天師曰: 諸是學仙道士,不受首悔之法,則罪結無復解時,皆當悔過,《 昇玄內教無上尊經》燒香供養,并佩方素七十二字及無上大線。修行經年,然 後能得此無上登天畢契法,不傳始學者也。若違科犯約,則不得便受昇玄弟子 首悔之經也。兆等受經之身,慎之慎之。

天師曰:受此畢券,不得妄傳,并此經,要須奉行。精鍊畢訖,閑解道意,信心無疑。欲成其道,欲除其過,乃以此契及弟子以經付之也。若心不達

- ,取自我見,中心懷疑,信此浮好,乖彼真實,有如此之人,必躓地獄下鬼
- ,不得便以登天之書,傳與流俗行屍之輩。故以相告。慎之慎之。

太上洞玄靈寶宣戒首悔眾罪保護經卷下竟